

Menteri juga guna kad masa

Bahan asal dari Arkib
Negara Malaysia

KUALA LUMPUR, Ahad — Menteri-menteri dan pegawai-pegawai kanan Kerajaan tidak dikecualikan dari menggunakan kad-kad penentuan waktu yang bermula awal bulan depan sebagaimana dikenakan kepada kakitangan yang lain.

Adalah difahamkan, perbincangan untuk melaksanakan sistem tersebut sedang berjalan dan tidak ada seorangpun dikecualikan.

"Menteri-menteri haruslah menjadi contoh. Tidak ada sebab mereka tidak boleh datang pada waktu yang ditetapkan sedangkan Perdana Menteri dan Timbalannya boleh berbuat demikian," kata sumber-sumber yang rapat dengan kabinet.

Perdana Menteri, Datuk Seri Dr. Mahathir Mohamad mementingkan supaya Menteri-menteri kabinetnya dan pegawai-pegawai kanan Kerajaan supaya datang tepat pada waktu yang juga dianggap sebahagian dari langkah mewujudkan sebuah Kerajaan yang berah dan cekap.

Sekiranya terdapat Menteri dan pegawai-pegawai yang mengabaikan arahan, mereka akan menerima akibatnya dari pimpinan baru.

Buat permulaan, sistem menggunakan kad-kad penentuan waktu itu akan dikuatkuasakan di empat buah kementerian.

Kementerian tersebut ialah Kementerian Hal Ehwal Dalam Negeri, Kementerian Perusahaan Awam, Kementerian Kesihatan dan beberapa bahagian dalam Kementerian Jabatan Perdana Menteri.

Sumber-Sumber itu berkata, beberapa buah Kementerian termasuk empat kementerian dalam peringkat awal itu dengan sukarela akan menjalankan sistem tersebut.

Sumber-Sumber itu berkata, cara-cara tertentu akan dibuat untuk memastikan pekerja-pekerja luar menjalankan tugas di luar supaya tidak mengabaikan tugasnya.

Sukarela

Setengah pihak di dalam perkhidmatan Kerajaan mungkin asing mendapati sistem itu sebagai asing dalam ciri-ciri kebudayaan Malaysia.

"Mereka mungkin berfikir sistem ini hanya dijalankan di kilang-kilang. Tetapi sistem ini haruslah disanjung kerana ia bukan sahaja mengandungi langkah-langkah disiplin tetapi juga bertindak sebagai asas menilai prestasi dan juga kehadiran mereka," kata sumber itu.

Pekerja-Pekerja yang tidak mematuhi aturan dengan mudah dapat diketahui dan tindakan akan diambil terhadap mereka.

Pada masa ini mereka tidak dapat dikesan kerana tidak ada sistem tertentu yang boleh berbuat demikian.

Kedatangan lewat dan alasan mereka akan diletakkan dalam bahagian yang berasingan di atas kad mereka.